



Rabu, 27 Desember 2023

Ogen: 1 Samuel 2:1-11



Ukur si Ersurak



Uga nge kira-kira respon i bas kita tupung kita ndedah pertandingan sepak bola, janah menang grup si pihak kita? Tentu ersurak kita, meriah siakap amin pe kita terjeng penonton. Uga ka akapndu ukur Hanna si labo jadi penonton tapi pemain. Ia si jadi pemeran utama. Mesui kal pusuhna ibahan kiduana, latih akapna rukur erkiteken ikataken ia diberu si la banci mupus, tole nari ikataken perbahan dosana. Amin pe teridah kekelengen perbulangenna man bana, lenga malem pusuhna. E maka lawes ia ku rumah pertoton, itungkaskenna kerina isi pusuhna ras atena mesui man Tuhan. Tutus kal atena nuriken sura-surana janah alu meteruk ukur ipindokenna man Tuhan.

Ersurak kal Hanna sabap ibegiken Tuhan pertoton ras peminndonna. La teralang riahna ukurna, malem kal pusuhna ibahan Tuhan. Lanai lit dalanna kiduana empekitik ras naling-nalin ia, sabap ibereken Tuhan sada anak dilaki tubuh arah bertinna. Labo ia mandul, kai si ikataken kiduana kerna ia sada pe la tuhu. Ibela Tuhan kal ia, kalak si meteruk rukur dingan si erkiniteken.

Lebih kal riahna adi kita jadi pemain i bas pertandingan ras menang. Nangtang singalah-ngalah. Hanna labo ban beluhna, labo ban usahana, tapi Dibata si mereken kemenangan man bana. Ersurak kal pusuhna, janah iberitakenna kerna kiniulin Dibata si nampati ia arah ende-endenna. Isaksikenna maka Dibata e badia, la lit ise pe bagi IA. Tuhan Dibata ngenca simetehsa sikugapana pe. Si ikataken manusia melala la tuhu, tapi siikataken Dibata kerina tuhu. Hanna njadikan Dibata jadi hakim antara ia ras kiduana. Janah igejapken Hanna ia isampati Tuhan. Adi Tuhan jadi hakimta, ugakal pe si bujur ibelaNa. Perlu kal si usih perbahanen Hanna enda. La erbalas man kiduana, la ipertangisina perbulangenna, tapi ercakup ia ras Dibata. Em simaba keriahen.